

## (( Sambene innozzente ))

In cust'era moderna e progredida  
 'ue abundat tantu benistare  
 'ue s'omine (prite a lu negare)  
 grascias a Deu passat menzus vida.

Eppuru alu esistin sos dannados  
 de sambene sididos: mala sorte;  
 de velenu e odiu impastados  
 nd'ettan sas domos, giogan chin sa morte!

Onzi tantu assustendennos de nou  
 nd'essit fora su mortu, crivelladu;  
 reu tantu pro narrer e gupadu  
 pro haer fattu su dovere sou.

Dagh'intende frusciende sos isparos  
 ch'isquartan s'aera, it'angustia;  
 e gridos invochehde "Mamma mia"  
 si m'altuddan sos pilos, frades caros!

Isterridos in terra a conc'appare  
 ruen che pira cotta. Arragiolidos  
 sos corvos airados e famidos  
 recuin si b'hat logu a ispulpare.

A daghi si tempestan sos dannados  
 si riunin su fogu pro aberrere;  
 organizzan tremendos attentados  
 fina contra a s'istadu, it'hana a cherrere?

Zent'istruida e zente profana  
 presidentes, illustres magistrados  
 morin che canes, medas ispregiados  
 chi fina a los connoscer dat mattana.

Ahi! cantas isposas battiadas  
 s'appunzan pianghende a pilisortu;  
 e a sas criaduras ofanadas  
 si lis legget in cara s'iscunfortu.

Bestidos de irgenza e disonore  
 ch'agabades sa vida, hazis notadu;  
 poi de haer collezionadu  
 paurosas iscenas de dolore.

Da-e crasa, in paghe istet sa zente  
 siemus tottu frades in sa vida;  
 siat donzi tragedia finida  
 como bastat su sambene innozzente.

Motto: luna noa

MONZITA GIUSEPPE  
 PATTADA